

Na osnovu člana 16. stav 4. Zakona o Vladi Zeničko-dobojskog kantona („Službene novine Zeničko-dobojskog kantona“ broj: 7/10), a u skladu sa članom 42. Zakona o izvršenju Budžeta Zeničko-dobojskog kantona za 2015. godinu („Službene novine Zeničko-dobojskog kantona“, broj 2/15), na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona na 32. sjednici, održanoj 29.10.2015. godine, d o n o s i

## **ZAKLJUČAK**

**o usvajanju Programa utroška namjenskih sredstava za uređenje poljoprivrednog zemljišta za 2015. godinu, u razdjelu 23, Ministarstvo poljoprivrede, šumarstva i vodoprivrede, budžetska organizacija 01, potrošačka jedinica 0001, ekonomski kod 614400 NAD 404, Budžeta Zeničko-dobojskog kantona za 2015. godinu, pozicija „Finansiranje projekata iz sredstava za pretvaranje poljoprivrednog zemljišta u nepoljoprivredno zemljište“**

### **I**

Usvaja se Program utroška sredstava za uređenje poljoprivrednog zemljišta za 2015. godinu u razdjelu 23, Ministarstvo poljoprivrede, šumarstva i vodoprivrede, budžetska organizacija 01, potrošačka jedinica 0001, ekonomski kod 614400 NAD 404, Budžeta Zeničko-dobojskog kantona za 2015. godinu („Službene novine Zeničko-dobojskog kantona“, broj 2/15), pozicija „Finansiranje projekata iz sredstava za pretvaranje poljoprivrednog zemljišta u nepoljoprivredno zemljište“ u iznosu od 998.746,00 KM (slovima: devetstotina-devedesetosamhiljadasedamstočetredesetšest konvertibilnih maraka), koji čini sastavni dio ovog zaključka.

### **II**

Sredstva planirana ovim Programom utroška sredstava za uređenje poljoprivrednog zemljišta, realizovat će se u skladu sa stanjem na računu Zeničko-dobojskog kantona broj: 1340100000001672, vrsta prihoda 722422.

### **III**

Zadužuju se Ministarstvo za poljoprivredu, šumarstvo i vodoprivredu i Ministarstvo finansija da realizuju ovaj zaključak svako u okviru svojih nadležnosti.

### **IV**

Stavlja se van snage Zaključak Vlade Zeničko-dobojskog kantona broj: 02-24-17919/15 od 02. 10. 2015. godine.

### **V**

Zaključak stupa na snagu danom donošenja.

Broj: 02-\_\_\_\_\_ /15.  
Datum, 29.10.2015. godine  
Zenica

**PREMIJER**

*Miralem Galijašević*

DOSTAVLJENO:

1x Ministarstvu za poljoprivredu, šumarstvo i vodoprivredu,  
1x Ministarstvu finansija,  
1x a/a.

**PROGRAM**  
**Utroška namjenskih sredstava za uređenje poljoprivrednog zemljišta za**  
**2015. godinu**

**Podaci o Programu**

- 1. Program je usvojen:** Na 32. sjednici Vlade Zeničko-dobojskog kantona održanoj dana 29.10.2015. godine
  
- 2. Period realizacije Programa:** 2015. godina i prva polovina 2016. godine
  
- 3. Ukupna vrijednost Programa:** 998.746,00 KM
  
- 4. Namjena i svrha Programa:** Uređenje poljoprivrednog zemljišta s ciljem povećanja . plodnosti zemljišta primjenom mjera kojima se provodi poboljšanje fizičkih, hemijskih i bioloških osobina poljoprivrednog zemljišta. Povećanje proizvodne sposobnosti i unapređenje gospodarenja poljoprivrednim zemljištem.
  
- 5. Korisnici Programa:** Fizička i pravna lica čije se prebivalište ili sjedište i zemljište nalaze na području Zeničko-dobojskog kantona.
  
- 6. Izvori sredstava:** Namjenska sredstva u Budžetu Zeničko-dobojskog Kantona za 2015. godinu stavka finansiranje Projekata iz sredstava prikupljenih pretvorbom poljoprivrednog u nepoljoprivredno zemljište, a koja se nalaze u razdjelu 23, budžetska organizacija 01, potrošačka jedinica 0001, ekonomski kod , 614400, NAD 404. Na osnovu Zakona o izvršenju Budžeta Zeničko-dobojskog kantona za 2015. godinu („*Službene novine Zeničko-dobojskog kantona*“, broj: 02/15).
  
- 7. Odgovorna osoba:** Ministar Himzo Smajić

## **I UVOD**

Svakodnevno se iz poljoprivrede oduzimaju hektari obradivog poljoprivrednog zemljišta za izgradnju naselja, industrijskih objekata, saobraćajnica, eksploataciju mineralnih sirovina ili izvođenje drugih radova kojima se trajno onemogućava upotreba tog zemljišta za poljoprivrednu proizvodnju.

Zakonom o poljoprivrednom zemljištu (*"Službene novine Federacije BiH"*, broj: 52/09) utvrđuju se definicije, osnovna načela i upravljanje, zaštita, korištenje i uređenje, raspolaganje, evidencije i ostala pitanja koja se odnose na poljoprivredno zemljište. Poljoprivredno zemljište Zakon definira kao prirodno bogastvo i dobro od općeg interesa koje uživa posebnu zaštitu i koristi se za poljoprivrednu proizvodnju i ne može se koristiti za druge svrhe osim u slučajevima i pod uvjetima utvrđenim ovim Zakonom. Promjena namjene poljoprivrednog zemljišta provode se u skladu sa planovima prostornog uređenja i aktima određenih citiranim Zakonom. Poljoprivredno zemljište može se početi koristiti u nepoljoprivredne svrhe samo uz saglasnost kantonalnog ministarstva i nakon uplate naknade propisane Zakonom o poljoprivrednom zemljištu.

## **II. IZVOR SREDSTAVA ZA REALIZACIJU PROGRAMA**

Ministarstvo za poljoprivredu, šumarstvo i vodoprivredu Zeničko-dobojskog kantona ostvaruje provođenje važećeg Zakona o poljoprivrednom zemljištu na način da u postupku legalne gradnje kao nadležan organ, izdaje poljoprivrednu saglasnost za promjenu namjene poljoprivrednog zemljišta kojom određuje visinu naknade. Propisana naknada uplaćuje se na poseban račun utvrđen za ove namjene, depozitni račun Zeničko-dobojskog kantona broj: **134010000001672, vrsta prihoda 722422.**

Budžetom Zeničko-dobojskog kantona za 2015. godinu (*"Službene novine Zeničko-dobojskog kantona"*, broj:02/15), ekonomski kod 614400, NAD 404, pozicija finansiranje projekata iz sredstava za pretvaranje poljoprivrednog zemljišta u nepoljoprivredno zemljište planiran je utrošak sredstava za uređenje poljoprivrednog zemljišta u iznosu od 998.746,00 KM.

Ministarstvo finansija Zeničko-dobojskog kantona kao nadležni organ, vodi evidenciju pojedinačnih platnih naloga za ovu vrstu prihoda, izvještava Ministarstvo za poljoprivredu, šumarstvo i vodoprivredu Zeničko-dobojskog kantona o naplaćenim naknadama za korištenje poljoprivrednog zemljišta u nepoljoprivredne svrhe o mjesečnom i ukupnom prilivu sredstava u tekućoj godini, a na kraju godine dostavlja izvještaj o ukupnom stanju na računu. Ministarstvo za poljoprivredu, šumarstvo i vodoprivredu Zeničko-dobojskog kantona na osnovu dostavljenih podataka vodi evidenciju o realizaciji naplate naknade po izdatim saglasnostima za promjenu namjene poljoprivrednog zemljišta.

Shodno prilivu sredstava Ministarstvo za poljoprivredu, šumarstvo i vodoprivredu Zeničko-dobojskog kantona planira korištenje istih za provođenje mjera uređenja

poljoprivrednog zemljišta s ciljem povećanja plodnosti i proizvodne sposobnosti poljoprivrednog zemljišta, primjenom mjera kojima se obavlja poboljšanje fizičkih, hemijskih i bioloških osobina poljoprivrednog zemljišta.

Članom 7. Odluke o korištenju sredstava prikupljenih od naknada za promjenu namjene poljoprivrednog zemljišta („*Službene novine Zeničko-dobojskog kantona*“, broj: 05/15) propisano je da su korisnici sredstava uređenja dužni izvršiti uplatu za rad komisije koja vrši ocjenu uređenja poljoprivrednog zemljišta, ista se uplaćuju na depozitni račun Zeničko-dobojskog kantona broj: **134010000001672, vrsta prihoda 722631.**

Namjena ovih sredstava je plaćanje stručnih komisija u ocjeni uređenja poljoprivrednog zemljišta, što se realizira u skladu sa Uredbom o sastavu komisija i naknadama članova komisija u okviru kantonalnih organa uprave i općinskih službi za upravu u upravnom postupku (Prečišćen tekst) („*Službene novine Zeničko-dobojskog kantona*“, broj: 06/04). Preko 50% ovih sredstava je prihod koji ide u Budžet Kantona.

### **III. NAMJENA SREDSTAVA**

Zakon o poljoprivrednom zemljištu ("*Službene novine Federacije BiH*", broj: 52/09) regulirao je da se sredstva od naknada koriste u slijedeće svrhe:

1. Izradu osnova, programa i projekta zaštite, korištenja i uređenja poljoprivrednog zemljišta;
2. provođenje mjera zaštite, korištenja i uređenja poljoprivrednog zemljišta;
3. uspostava informacionog sistema za zemljište;
4. zemljišni monitoring;
5. izradu karte upotrebne vrijednosti zemljišta;
6. izradu projekata višenamjenskog vrednovanja;
7. realizaciju poslova utvrđenih Strategijom i Programom gospodarenja;
8. dekontaminaciju zemljišta i podizanje zaštitnih pojaseva u neposrednoj blizini putnih komunikacija.

Provođenje mjera zaštite, korištenja i uređenja poljoprivrednog zemljišta, korištenje sredstava po ovoj stavci uređeno je Odlukom o korištenju sredstava prikupljenih od naknada za promjenu namjene poljoprivrednog zemljišta („*Službene novine Zeničko-dobojskog kantona*“, broj 05/15) kojom se reguliše korištenje sredstava za uređenje zemljišta, a sredstva će se odobravati za kulturno-tehničko uređenje zemljišta, agrotehničke i hidrotehničke mjere i radove na poljoprivrednom zemljištu, kojima se poboljšavaju fizičke, hemijske i biološke osobine zemljišta.

Uređeno poljoprivredno zemljište po ovom Programu u narednih 10 (deset) godina, mora se koristiti jedino kao poljoprivredno i ne može mu se promijeniti namjena iz poljoprivrednog u nepoljoprivredno.

Osim Zakonom utvrđene namjene utroška sredstava, svrha ovog Programa je da se nastave započeti i otvore novi procesi u poticanju razvoja poljoprivredne proizvodnje na području Zeničko-dobojskog kantona. Ulaganjem u uređenje poljoprivrednog zemljišta potičemo i :

- očuvanje poljoprivrednog zemljišta od promjene namjene u narednih 10 godina;
- namjensko korištenje poljoprivrednog zemljišta;
- povećanje površina obradivog poljoprivrednog zemljišta;
- smanjenje površina neobradivog poljoprivrednog zemljišta;
- smanjenje površina i uređenje zapuštenog poljoprivrednog zemljišta, koje je

zakorovljeno i obraslo samoniklim i šumskim rastinjem;

- poboljšanje strukture zemljišta, fizičkih, hemijskih i bioloških osobina zemljišta;
- sprečavanje erozija kao posebnog odnošenja zemljišta;
- povećanje proizvodne sposobnosti poljoprivrednog zemljišta;
- povećanje nivoa poljoprivredne proizvodnje;
- stvaranje konkurentnijeg poljoprivrednog proizvođača;
- omogućavanje ekonomičnijeg pokretanja poljoprivredne proizvodnje;
- poboljšanje ekonomskih efekata za poljoprivredne proizvođače itd.

Realizacijom nabrojanih mjera doprinosimo strategiji gospodarenja poljoprivrednim zemljištem, odnosno unapređenju poljoprivredne proizvodnje na području Zeničko-dobojskog kantona.

**PREGLED PLANA UTROŠKA NAMJENSKIH SRETTAVA ZA 2015. godinu**

<i>r/b</i>	<i>Vrsta sredstava</i>	<i>Rok za realizaciju aktivnosti</i>	<i>Iznos planiranih sredstava u (KM)</i>
1.	<i>Sredstva naplaćena po osnovu promjene namjene namjene poljoprivrednog zemljišta u nepoljoprivredne svrhe</i>	<i>Do 30. juna 2016. godine</i>	998.746,00
<b>Ukupno:</b>			<b>998.746,00</b>

Sredstva navedena u pregledu planirana su da se utroše za uređenje i monitoring poljoprivrednog zemljišta u 2015. godini. Po usvajanju Programa raspisat će se javni poziv za prijavu fizičkih i pravnih lica za korištenje namjenskih sredstava za uređenje poljoprivrednog zemljišta, a odnosit će se na uređenje koje će podnosioci zahtjeva realizirati u periodu pripreme za jesenju sadnju i sjetvu 2015 godine i proljetnu sadnju i sjetvu u 2016. godini.

Sredstva navedena u pregledu u iznosu od 998.746,00 KM planirana su da se utroše za provođenje mjera zaštite, korištenja i uređenja poljoprivrednog zemljišta u skladu sa Odlukom o korištenju sredstava prikupljenih od naknada za promjenu namjene poljoprivrednog zemljišta („Službene novine Zeničko-dobojskog kantona“, broj: 05/15) kojom se reguliše korištenje sredstava za uređenje zemljišta.

**IV. KRITERIJI ZA KORIŠTENJE SRETTAVA ZA UREĐENJE POLJOPRIVREDNOG ZEMLJIŠTA**

Po ovom Programu sredstva za uređenje zemljišta mogu se koristiti samo za uređenje poljoprivrednog zemljišta slabijeg kvaliteta kojem se povećava plodnost i proizvodni potencijal, kao uslov za povećanje poljoprivredne proizvodnje na području Zeničko-dobojskog kantona.

Pravo na korištenje sredstava po ovom Programu, imaju pravna i fizička lica, vlasnici poljoprivrednog zemljišta sa područja ovog Kantona, koji ispune propisane kriterije iz Odluke o korištenju sredstava prikupljenih od naknada za promjenu namjene poljoprivrednog zemljišta, Uputstva o korištenju sredstava i ovog Programa.

Prioritet u korištenju ovih sredstava u 2015. godini imaju podnosioci zahtjeva uključeni u programe zasnivanja novih zasada maline, kupine, Američke borovnice i aronije, uređenje zemljišta namjenjenog za proizvodnju povrća u zatvorenom prostoru i uređenje zemljišta oštećenog u poplavama iz 2014. godine koje se koristilo, a trenutno se ne koristi za poljoprivrednu proizvodnju.

U prijavi na Javni poziv za uređenje poljoprivrednog zemljišta podnosioci zahtjeva prilažu propisanu dokumentaciju.

Urednim podnosiocima zahtjeva obavit će se prvi komisijski pregled, te sačiniti zapisnik u kojem će se naložiti mjere uređenja ili će se konstatovati da ne ispunjava uslove za uređenje kandidirane parcele.

Korisnik čiji je zahtjev opravdan dužan je na osnovu zapisnika Komisije da obezbijedi Projekat uređenja zemljišta koji je zasnovan na predloženim okvirnim mjerama uređenja poljoprivrednog zemljišta urađen od strane pravnog lica, registriranog za te poslove ili urađen od strane dipl. ing. poljoprivrede uz reviziju projekta od strane institucije koja je registrovana za te poslove.

Projekat obavezno treba da sadrži:

1. Dokumentaciju o vlasniku/vlasnicima poljoprivrednog zemljišta (kopiju katastarskog plana, posjedovni list ili zemljišnoknjižni izvadak parcele ili parcela koje su predmet uređenja),
2. Opće karakteristike područja gdje se nalazi parcela kandidirana za uređenje poljoprivrednog zemljišta (klimatske, pedološke, hidrografske),
3. Pedološki nalaz zemljišta prije uređenja parcele,
4. Projektno rješenje za poboljšanje kvaliteta obradivog poljoprivrednog zemljišta (tehničko uređenje terena, hidrotehnički i agrotehnički radovi),
5. Razrađene troškove ulaganja.,

Shodno članu 84. Zakona o poljoprivrednom zemljištu podnosioc zahtjeva projekat dostavlja Federalnom ministarstvu za poljoprivredu, vodoprivredu i šumarstvo koje izdaje rješenje o odobravanju projekta.

## **V. REALIZACIJA PROGRAMA**

Program će se realizirati u periodu od kraja oktobra 2015. godine do kraja juna 2016. godine.

Broj: 02-\_\_\_\_\_/15.  
Datum, 29.10.2015. godine  
Zenica

**PREMIJER**

*Miralem Galijašević*

DOSTAVLJENO:

1x Ministarstvu za poljoprivredu, šumarstvo i vodoprivredu,  
1x Ministarstvu finansija,  
1x a/a.